

## LA STATISTICA

Sunnu l'una, zu Peppi, chi mangiati?  
Chi vi pripara la vostra cristianedda?  
Picciotti, emu suffertu a cacaredda,  
Dicinu chi li frutta sù variati;  
Avenu na bedda cucuzzedda.  
Zu Peppi, un vi fa dibilitati?  
Comu la fa fritta nta paredda?  
Sparagnu l'ogghiu, la fazzu a cupatedda.  
Dopu, un pocu di vinu un ci lù cafudda?  
Lu vinu lu vivu supra la cipudda!

Zu Peppi e carni nunn'accatta?  
Havi chi nun vaiu nta lu vucceri!  
Vonnu l'aricchini da mughieri  
Pi na fedda di carni pi la atta!  
Allura picchè unn'accatta pisci?  
Picchè tu li prezzi nun li viri?  
Di chiddi chi affetinu li piatta,  
Ha parlari supra ventimilaliri.  
Comunque ci pensa a me cristiana,  
Sun trova a cucuzza, c'esti a milingiana.

Però ogn'annu fannu la statistica  
Di quantu morti e quantu parturenzi,  
Quantu novi arrivati e di partenzi,  
Comu un fogghiu di l'enigmistica.

Quantu porci e viteddi chi si mangia,  
Quantu pecuri, agneddi cu gaddini  
E ogn'annu ammuntanu bastimenti chini.  
E si tu un ni mangi, c'accattari nun li poi,  
Vannu sempri nta la pircintuali,  
C'è nautru chi si mangia chiddi toi.

Lu stessu pi lu vinu e li bivandi,  
Ogn'annu fannu lu cumulativu,  
Zu Peppi, na speci di privintivu!  
Pu populu è na cosa interessanti,  
Nun c'è bisognu d'essiri struitu,  
Nè furbu, né pueta, né birbanti.  
Cu vivi vinu di Frascati e Chianti  
E lu zu Peppi marsaletta e acìtu.  
Di quant'havi chi lu munnu fu furmatu,  
Lu scarsu ha statu sempri cugghiunatu!

## LU CUMMENTU DI LU POPULU

L'annu sessantasei la civiltati  
Invasi la città di Trapani e Marsala,  
Arretranu sti Comuni, l'impinati,  
La munnizza s'arrunza cu la pala,  
Catasti, muscagghiuna strati strati,  
Lu fetu lu pittuzzu nn'arriciala,  
Qualcunu puru lu cantaru ci schizza,  
Semu mmezzu lu fetu e la munnizza!

E quanti mpiati chi ci sunnu,  
Sunnu numerosi e fannu nenti,  
Stannu ittannu la nazioni nfunnu,  
Quantu custanu sti quattru documenti?  
C'è chiddu chi firrìa sempri ntunnu,  
Cu si leggi lu giurnali e fà nenti;  
Lu populu cinsura e unn'havi tortu,  
Na pratica passa a dicirottu!

Si presenta a lu Comuni un viddaneddu,  
Nta na iurnata di fiddu, ncapputtatu,  
Arriva, tuppulia a lu spurteddu:  
Avissi bisognu d'un certificatu.  
S'inchìna, si livau lu birritteddu,  
Vabbeni ci rispusi l'impinatu,  
Datimi li vostri cunnutati,  
Ddocu c'è lu vancu e v'assittati.

Lu viddaneddu nta lu vancu, s'assittau,  
Lu mpiatu lu spurteddu cci chiurù,  
Na simana di travagghiu rimannau,  
Ora vi cuntù comu ci finìu:  
Un signurinu apri, s'infilau,  
Lu sbrigaru prestu e sinni scù,  
Lu viddaneddu è sempri dda assittatu,  
Ancora aspetta ddu certificatu!

## MACELLU

Sapiti comu fannu li vucceri  
Quannu chi trattanu l'agneddi  
E autri armali di tanti maneri  
Grossi, mizzalini e nicareddi?  
Siccomu sunnu franchi du misteri,  
Accarizzannuli ci occhianu la peddi.  
Accussì stannu facennu pianu pianu  
N'accarizzanu la peddi a tutti nzanu.

## SFILATA DI SURDATI

Lu Re e la Rigina affacciati,  
Taliavanu la sfilata naziunali,  
Di la chiazza a la strata principali,  
Passaru a ciumara, li surdati.  
A tonu di marcia triunfali  
Davanu lu passu i graduati,  
Sirgenti, Marascialli e Ufficiali.

Mitragli, mula cu sidduna,  
Caschi di pulviri e pastrani,  
Cavallerìa, camii e camiuna  
E a mizz'ariu tanti aeruplani,  
Puru tanti cappeddi e cappidduna  
Oltri li muschetti lucidati.  
Pi meticci brudigghìa e cavatuna,  
Lu solitu ranciu di surdati.

Dici la Rigina ntelligenti:  
Pi manciari tutti sti cristiani,  
Ci bastanu centu vistiola sani?  
Risposi lu Re, centu sunnu nenti,  
Tra Ginirali, Culunnelli, Capitani,  
Tenenti, Marascialli cu Sergenti;  
Pi la truppa chi manteni la culonna,  
S'aspetta chi si cocìnu li corna!

## LI MARAVIGGHI DI TRAPANI

Trapani ch'eri rigina di lu sali,  
Vasata di lu mari e di lu sulì,  
Siroccu, tramuntana e maistrali  
Giravanu li mulina sulì sulì.  
Ora fuma lu bacinu e l'arsinali,  
Li villi cu li rosi e li viuli;  
E mmezzu stu paraddisu senza scali,  
Ririnu l'ottantottu sulì sulì.

Circa centu sunnu li spazzini,  
Un gran numaru li cuntabili e scrivani,  
Na cinquantina tra cantunera e li bicchini  
Sparti di chiddi addetti a li funtani  
E tra Sinnacu, assissura, galuppini,  
Sinzala, facciulazzi e ciarlatani,  
Ogni misi nun bastanu quattrini  
Tra arritrati, aumenti e caru pani.

Priparanu lu lettu e la ricchizza,  
A li turisti chi vennu, d'ogni razza,  
Li ricivinu cu tanta tinnarizza,  
Nta stu salottu fattu a matarazza.  
Li strati villutati di munnizza,  
Lu fangu brilla mmezzu li fussazza,  
L'illudinu cu minchi pi sosizza  
E muzzicuna d'inzetti d'ogni razza.

Li funtani su tutti disiccati,  
Chini di ruggia, fradici e purriti,  
Li trapanisi sù sempri assitati,  
Acqua picca, chi nun leva siti.  
Li cacatura tutti ntartarati,  
Ci voli la maschira prima chi trasiti,  
Sù chini di dicottu e cantarati  
Chi pisciannu veni la castenteriti.

Li surci ballanu dintra li quarteri,  
Li muschitti stannu a svulazzari,  
All'anguli ammunzidduna lu fumèri,  
Lu fetu siccu chi nun si pò affacciari.  
Li poviri studenti spissu a pperi,  
L'autobus sempri a sciupirari,  
Sinnacu, assissura e cunzigghieri  
Dicinu sempri chi nun c'è dinari.

Chi nni dicinu li nostri diputati  
E babbatura di tutti li partiti?  
Acchiananu, si fannu li mangiati  
E pi cinc'anni cchiù nun li viditi.  
Tri quarti di cità sempri allagati,  
Li fognaturi chini di ditriti:  
Si riclamanu sunnu biasimati  
Comu tanti pupiddi ncritiniti.

Pi nesciri di mmezzu la malura  
Scrivinu a la Rigionu chi ripara.  
Firmanu lu dcretu cu primura  
E li miliardi arrivanu a ciumara.



Arrivata la summa, dopu un'ura,  
Si rumpi lu cunzigghiu, c'è caciara,  
E tutti li sordi di la mangiatura,  
Sù comu un sucuni di la ddaunara.

## MARIE MUNNU

Si sintiti lu gazzettinu ricitari,  
Miliardi nni stanzianu ogni gghiornu  
Di la cassa di lu mezzugornu,  
Cifri chi fannu spavintari!  
Cu la liggi di l'articulu trentotto,  
Miliardi stanza lu Governu cintrali;  
Sti sordi li stampanu cu l'ali,  
Nun c'è tempu di rapiri li mazzi,  
Volanu ncursa comu l'aciddazzi!

Currinu, fannu svulazzati  
Supra Palermu, firriànu ntunnu,  
Vannu scuagghiannu nta l'Assissurati,  
Nta tutti sti marpiuna chi cci sunnu;  
Dunni soffrinu migghiara di mpiati,  
Chi tennu li tavuli chini di cartazzi.  
Di carti ponnu inchiri schifazzi!  
Stannu cu li testi frasturnati,  
Fannu sempri a circari documenti,  
Su arrivati cun capiscinu cchiù nenti!

Pratichi ci nni sunnu a munzidduna,  
C'è di inchiri malaseni chini.  
Genti vannu e vennu a miliuna,  
Appartatura, ndustriali, cuntadini,

Pi dari a li so' pratici ammuttuna  
Cu capi di partitu e malandrini;  
Li pratici chi stannu pi spicciari,  
Sù chiddi di li Monaci e Parrini.

Li Monaci vugghinu, comu li fufui!  
Subitu li fannu accumulari,  
Trasinu dintra e nunn'escinu cchiui,  
A vista si li fannu cumpilari.  
E li genti chi stannu ad aspittari,  
Di prima matina finu a li dui,  
Ci dunanu all'uscita na puntata:  
Riturnati all'otra simanata!

Un cuntadinu facia na lamintura,  
Di la cuntrada di lu Fulgaturi:  
Acquistau un picculu tratturi,  
Cu cuntributu di l'agricultura.  
Passaru cinc'anni nun ci avia arrivatu,  
Un ligali ci detti summu aiutu  
E dopu deci anni arrivau lu cuntributu.  
Li sordi chi pigghiau di lu mannatu,  
Nun ci bastaru pi pagari l'Avvocatatu!

Chista è la sacra e santa viritati,  
Qualcunu liggennu mi cinzura,  
Cu dici chi sugnu foddi addirittura;  
Sti quattru sinzaleddi nuddicati  
Cu quattru fasoli e favi calciati,  
Chi stannu a fari li tramizzatura  
Circannu voti a tempu di elezioni  
Frigannu a lu zu Cicciu e a lu zu nToni!